

四庫全書

史部

欽定四庫全書

史部

平定準噶爾方略前編卷

四十九至
五十一

詳校官監察御史

臣孫家賢

通政使司副使

臣莫瞻菴覆勘

總校官進士

臣朱

鈴

校對官中書

臣

李斯咏

謄錄監生

臣

李亭植

欽定四庫全書

平定準噶爾方略前編卷四十九

乾隆十一年春正月甲戌

命郡王頗羅鼐保奏一子承襲封爵

上諭軍機大臣等曰西藏郡王頗羅鼐素効忠誠勤勞懋著自朕御極以來一心靖共凡事俱竭力奮勉辦理妥協殊屬可嘉著加特恩將伊子內封一長子長子係日後襲王爵總理彼處事務之人關

係緊要著諭知駐藏辦事之副都統傳清將朕此
旨曉諭頗羅鼐在伊二子內擇一才堪繼續悅服
衆心裨益公務者保奏候朕降旨

乙未

定議辦理投誠夷人事宜

甘肅巡撫黃廷桂奏言向來沿邊蒙古及哈密
瓜州回民并準夷人等投誠或令本處團聚或
於別處安插今聞噶爾丹策零病故恐其部落

內亂致生事端嗣後辦理投誠夷人應請少加
分別如蒙古番回原非準夷所屬仍照前例辦
理若有準夷頭目率衆來款應請

旨定奪如不過一二無關緊要夷人前來歸命或羈
管哈密候夷使進

貢曉諭帶往或即於卡倫外賞給口糧令自行回
巢奉

旨軍機大臣議奏尋議查噶爾丹策零病故與否未

有確信如彼處有事酋目率衆歛關投誠應如所奏請

旨定奪至尋常投誠之人仍照舊例辦理無庸令夷使帶回及令自行回巢致失懷遠之義奏入上從之

二月辛丑

北路軍營叅贊大臣拉布敦烏爾登期滿以護軍統領塔爾瑪善副都統銜努三代之

三月乙亥

夷使哈柳至京進表請

安並貢方物

準噶爾台吉策妄多爾濟那木扎爾謹奏

大皇帝蒙

大皇帝加恩我父內外和好我父因仰體

大皇帝宣揚黃教奠定蒼生之意恭順遵循令我父

已故竊欲勉繼父志照舊行事以承

恩典現擬遣人往西藏念經為我父修行善事循例
先遣數人輕騎前往懺悔獻茶而回繼令念大
經人衆進藏以宣黃教伏祈

大皇帝睿鑒謹遣使臣恭請

萬安並貢貂皮四十一張奏入報

聞

壬午

賜準噶爾使臣哈柳等宴

上召見哈柳諭之曰朕覽爾新台吉奏章欲效法伊
父體朕宣揚黃教奠定蒼生之意冀承恩典朕甚
嘉悅爾老台吉比年以來甚屬恭順遵循朕旨是
以屢加恩眷今已病故深為軫惜爾新台吉又為
伊父懇請遣人往西藏念經行善事乃理所應為
朕自當准其所請但作為兩次前往事覺繁瑣且
爾等進藏之人艱於跋涉當已深悉不若作一次
前往為妥朕仍加恩照前賞給牲畜口糧中途資

助且為爾老台吉作布施禮及施恩賞賚之處現
交大臣等查辦豫備俟爾回時齎往哈柳跪奏
大皇帝之旨大人等先經曉諭令又面聆

聖訓俟回時當告知我台吉敬謹遵行

上特賜玉如意一枝謂哈柳曰此名如意乃克遂心
願之謂特賜與爾新台吉者爾可齎往並

命賞哈柳玉如意亦一枝哈柳叩頭祇領

上親賜酒三爵哈柳跪飲而退

癸未

命提督李繩武巡閱邊界接見夷使

上諭軍機大臣等曰據李繩武奏夷使哈柳來時向都司閻相師云此次回去時求與將軍一見等語李繩武自調補安西提督以來尚未奏請巡閱邊界可傳諭令伊約計夷使回巢之時前往哈密等處巡視哈柳回巢經過欲求見面不妨與之相見備飯款待酌量給與物件一切相見儀節務存體

統不可草率從事

甲申

賜準噶爾台吉策妄多爾濟那木扎爾勅書

奉

天承運

皇帝詔曰朕總理天下無分內外一視同仁惟期普
天生靈各得其所台吉爾奏稱遵照爾父仰體朕
廣教安生之意朕甚嘉悅前爾父仰知朕意定界

以來敬謹遵奉諭旨朕屢次加恩體恤今聞溘逝
深為軫惜爾奏稱遣人往西藏諷經先輕騎減從
前往懺悔熬茶回時令諷大經人等續往諷經等
語為爾父懺悔諷經理所當行豈有不准但分作
二次徒覺繁瑣爾之人行走艱難爾亦知之當一
次全往為妥朕仍照前施恩派人照看賞賜牲畜
路費又為爾父作布施禮特恩賞銀滿達茶桶茶
喇各一紅黃香一百束交與使臣哈柳帶往又大

手帕百條小手帕千條茶葉千包令爾諷經之人
往藏時由邊界支取應往人數何時起程何日可
至邊界先期豫行報明又爾使臣哈柳口奏延請
西藏喇嘛及今年例應來京貿易之人祈就近在
肅州貿易二事延請西藏喇嘛前據爾父奏請時
朕即以不便准行明白降旨矣至今歲貨物欲於
肅州隨便貿易此可行之事准爾所請交與該地
方官照看貿易台吉爾一切事務惟當遵照爾父

仰體朕廣教安生之意敬慎奉行互相和好愈敦
信實俾邊氓永享安樂特勅交使臣哈柳齋回隨
勅賜爾各色緞十端蟒緞粧緞各八端玻璃磁器
瑤瑯器皿十八事爾其祇領

閏三月丁酉

夷使哈柳自京起程還部

辛酉

安西提督李繩武奏報貿易夷人賚木瑚里等

入境

丙午

甘肅巡撫黃廷桂疏奏豫備夷人貿易事宜

黃廷桂奏言向例準噶爾夷人於子辰申年在肅貿易寅午戌年在京貿易令歲例當在京貿易經夷使哈柳奏懇將夷貨在肅就近貿易得旨准行查向年夷貨在肅貿易派委叅將及知州等員照看并飭委肅州鎮道臣督率稽查令照例

委肅州鎮臣許仕盛甘肅道鈕廷彩等就近照
看又經臣等奏明動銀一萬五千兩往江南採
辦紬緞已抵蘭州現在夷貨將到將此項紬緞
交商人李永祚先行交易扣價還官俟伊自製
商貨運到再與夷人兌換庶夷人不致稽遲回
巢時日奏入報

聞

夏四月辛未

命封郡王頗羅鼐次子朱爾默特那木扎爾為長子
上諭內閣曰前以西藏郡王頗羅鼐一心肫誠奮勉
特施恩於伊二子內封一長子令伊指出具奏令
據頗羅鼐以伊長子珠爾瑪特策卜登已屬殘疾
次子朱爾默特那木扎爾堪以奮勉出力伊兄弟
互相遜讓並無爭競即彼處噶卜倫第巴大喇嘛
等亦皆心服等因具奏應如所請將朱爾默特那
木扎爾封為長子珠爾瑪特策卜登因從前帶兵

在邊境出力曾施恩封為輔國公今雖有殘疾不能効力並著加恩封為鎮國公該部知道

壬午

安西提督李繩武疏奏籌辦夷人貿易事宜

李繩武奏言查此次貿易夷人賚木瑚里等到境言語恭順而策妄多爾濟那木扎爾來文亦屬詞婉意和但此次帶來牲畜較上年之數甚多該夷等懇求在哈密變賣不但有違定例且

口外實無商賈臣前接肅州鎮道等札商因肅屬牧廠狹小請於嘉峪關外之花海子等處地方牧放俟商人講定價值再為趕入接收臣現在巡查親歷花海子各處地方遼濶逼近赤靖等處營汛南通青海各路北即接連北路卡倫及往準噶爾之大北路實有不便留牧之處已將緣由札覆肅州鎮道臣思肅州既無寬展牧廠且時屆夏初正田畝長發之時而該夷等亦

知牲畜衆多即口外路上水草亦屬有限恐損傷過多是以求在哈密售賣臣輾轉籌計行令哈密副將瑚寶將馬駝貨物令其先為起行赴肅其牛羊暫留卡外牧放臣現在札詢肅州鎮道上年貿易夷人牛羊在肅售變價值數目或應先在哈密講定價值豫先差員領商出口迎收抑或商人必須親自出口途中講價之處統俟覆到飛飭辦理庶不致該夷等稽延時日而

於內外民田既無擾攘之虞亦與該夷實有裨
益奏入報

聞

乙亥

準噶爾部人博克等來降

命賞給安插如例

五月壬子

安西提督李繩武奏報接見夷使情形

李繩武奏言臣於四月十五日巡邊至哈密夷使哈柳於二十二日自京回程亦抵哈密二十四日至公所與臣接見據哈柳告稱我此次進京因奏

聞我台吉噶爾丹策零病故之事荷蒙

大皇帝待我等恩典極重

賜噶爾丹策零銀滿達茶桶茶喇藏香尚有大小手怕茶葉著在邊界上支領又

賜我策妄多爾濟那木扎爾各色粧蟒緞疋玻璃磁
器瑤瑯器皿臣向哈柳云因汝台吉噶爾丹策
零並策妄多爾濟那木扎爾兩世俱在

大皇帝前恭順歸向是以加汝

大恩

大皇帝是普天之下

聖主所下吉祥

旨意即如汝等朝見活佛得好話一般向後常常恭

順自能常受

恩典哈柳又告稱此次

大皇帝復准我等帶領三百人往藏熬茶我等不敢
違例多帶人去臣向哈柳云既蒙

恩准汝熬茶汝等起身赴藏時即豫差人送信以便
豫備護送汝等相見禮畢哈柳等於二十六日
起身回部訖奏入報

聞

六月丁亥

定邊副將軍額駙策凌疏奏暫停輪派叅贊大臣閱看喀爾喀四部落兵丁

策凌奏言喀爾喀四部落游牧處所備揚威兵每年應各該副將軍察看軍營叅贊大臣兩年內閱看一次今歲應派軍營叅贊大臣前往閱看但查四部落內在戈壁居住之扎薩克等游牧處所因雨水不調至今青草未發牲畜尚未

養好向例俱於七月內閱看完畢游牧遠者乘
時趕回馬牛牲畜尚可肥壯若遲至八九月間
始行閱看實於牲畜無益應請今年暫行停止
閱看交各副將軍盟長等令其就近在各游牧
處自行查閱展至明年仍派叅贊大臣前往奏

入

上從之

庚寅

定議添設哈密卡倫

安西提督李繩武奏言哈密三堡之西南西喇
淖爾地方其西係通準夷魯克察克闢展之來
路從前原有卡倫後因該處水草不便盛夏馬
多倒斃奏請裁撤自裁撤之後準夷多有從此
潛過被獲者防範布置不可不周況盛夏人馬
難以存住之時準夷亦不能行走而春秋冬三
時自可派兵守望以收扼要之益且據哈密貝

子玉素富情願供辦馬草復與鎮臣王能愛商酌意見相同又巴達什地方為貝子玉素富牧放之廠西北二十餘里即係烏拉臺卡倫烏拉臺卡倫正北五十里有畢柳大坂一處畢柳大坂溝底係走鹽池通哈喇溪落等處之路而烏拉臺卡倫止能瞭望畢柳大坂溝口不能瞭望畢柳大坂溝底通出之路若於畢柳大坂安設一卡則與烏拉臺一卡並巴達什廠彼此聲氣

相通遇警可早得信奉

旨軍機大臣議奏尋議應如所奏西喇淖爾地方准
其添設一卡派兵二名間以纏頭三名每年八
月至次年四月止坐守瞭望其畢柳大坂地方
亦准其安設一卡派兵三名間以纏頭二名坐
守瞭望以資策應奏入

上從之

辛卯

命還俄羅斯逃人

定邊副將軍額駙策凌將自準噶爾投來之俄羅斯人伊番解京得

旨軍機大臣議奏尋議向與俄羅斯定議不相容留
逃人前雍正十二年俄羅斯婦人伊納博克投
至本境奉

旨從前準噶爾擄去我國二人投至俄羅斯曾經彼處
送還應將伊納博克亦送交俄羅斯邊上頭目令請

照此例令理藩院行文俄羅斯并派員將伊番
解送至恰克圖地方交與俄羅斯守邊頭目奏
入

上從之

秋七月己酉

命派青海扎薩克等更替巡守卡倫

辦理青海事務副都統銜衆佛保奏言准理藩
院咨稱青海扎薩克台吉達瑪林塞卜騰色特

爾布木巡守卡倫偵探邊境行走數年皆自備
資斧實屬勤慎伊等原為青海各蒙古游牧起
見其餘扎薩克亦應更替行走今青海扎薩克
大員內長子索諾木丹津貝子丹巴年力已壯
人俱明白去年木蘭隨圍王袞楚克達什策凌
喇卜坦公那木扎爾策凌雖係年幼人亦明白
俱蒙

皇上教養令在

乾清門行走宜令其輪班行走亦可以服習勤勞
應令衆佛保於今年會盟時將索諾木丹津等
與應派扎薩克一併揀派如何更替行走之處
定議具奏得

旨依議移咨到臣臣隨於會盟之日明白曉諭傳
旨與衮楚克達什策凌喇卜坦索諾木丹津丹巴那
木扎爾策凌據伊等五人懼怖跪稱我等累世
受

皇上殊恩俱以少年承襲顯秩數年來瞻仰

天顏蒙

恩挑取

乾清門侍衛親隨學習正欲得一効力之處稍圖
報効今蒙

賞給効力不勝懼忤等語再會盟處齊集各扎薩克
聽知揀派差遣無不跪求効力除達瑪林塞卜
騰色特爾布木二人原係防禦卡倫之人蒙

恩獎賞伊二人以行走熟練請願照常派入不敢稍懈復據薩喇衮布喇布坦塔爾濟塞卜騰三台吉叩請揀派出於至誠且人皆明白應將此五人與衮楚克達什等五人共派十人分作五班行走五年之內始輪一班在伊等自可從容行走並將得卜特爾伊克柴達木二路與伊等游牧處何旗近便之處令其自行定議續據伊等分派已定巡查前路得卜特爾卡倫派長子索

諾木丹津衮布喇卜坦扎薩克台吉色特爾布
木塔爾濟塞卜騰薩喇五行行走巡查北路伊
克柴達木伊遜察汗齊老圖卡倫派王衮楚克
達什策凌喇卜坦貝子丹巴公那木扎爾策凌
扎薩克台吉達瑪林塞卜騰五行行走每年輪
流巡查又據派出之衮楚克達什等叩稱前奉
諭旨青海派兵二千各在旗分處豫備如有帶領行
走之處著達瑪林塞卜騰色特爾布木二人帶

領令我等八人既蒙補派如有帶兵之時亦請
一同帶兵以効微勞又稱此項派出豫備兵丁
業已十年恐有因循廢弛之弊我等各於所分
備兵旗分游牧處查明軍需器械分別等第呈
報察核於三年舉行一次等語似應俱如所請
辦理奏入得

旨下部知之

八月丁卯

恩賞駐防軍營官兵緞布有差

定邊副將軍額駙策凌奏言軍營駐防之宣化
大同二處官兵計六百名居住五年其看守城
垣倉庫巡查街市以及一切差務俱無貽悞甚
屬勤勞出力臣等仰體

皇上軫念至意請將庫内存貯備賞緞布鞋內動用
賞賜叅將遊擊官素緞各一端守備花線緞一
端千把總彭緞各一端兵丁每名布各四疋鞋

二雙以示鼓勵奏入

報可

壬辰

甘肅巡撫黃廷桂奏報貿易夷人賚木瑚里等
自肅州起程還部

九月乙未

命展放喀爾喀游牧地方

定邊副將軍額駙策凌奏言乾隆五年遵

旨議定將喀爾喀游牧自安設內卡之齊克濟扎卜
堪哈薩克圖庫克嶺等處以內三四百里所有
鄂爾海地方為中南至博羅椿集塔爾拉布喀
岱罕淖爾登努勒台特穆爾哈巴西喇布魯圖
奇齊格納之阿魯通金鄂倫淖爾岱拉突魯北
至額得爾齊得爾之伯勒齊爾準蜀麻爾台桑
金達賴喀喇塔爾阿勒坦噶達蘇等處為外界
此內游牧居住各按指定之界不得踰越現今

戈壁地方連年少雨水草甚乏在戈壁等處游牧者俱移居杭愛地狹人稠水草愈覺不足蒙古生計甚屬拮据請將喀爾喀游牧少加展放令在安設內卡之扎卜堪等處內約計百里之遙游牧居住仍飭駐劄烏里雅蘇台叅贊大臣不時巡查奏入得

旨軍機大臣議奏尋議從前大兵在北路駐劄時將喀爾喀游牧曾經移進在翁金鄂爾昆之烏歸

淖爾等處為界至乾隆三年因與準噶爾定界
頒賜勅書指定厄魯特游牧不得過阿爾台山梁喀
爾喀游牧不得過扎卜堪等處至乾隆五年又
奉

上諭從前喀爾喀四部落游牧之地原有指定之界
今允準噶爾求和將喀爾喀游牧不得過扎卜堪
等處但各部落游牧之界若不指明恐喀爾喀不
知以為所定不過扎卜堪等處遂任意妄行游牧

亦未可定著額駙策凌等會同喀爾喀之副將軍
自扎卜堪以內將各住游牧之界相度指明不准
妄越之處核議以聞旋議定南至博羅椿集等處
北至額得爾齊得爾之伯勒齊爾等處為外界
今據額駙策凌奏為蒙古生計拮据請將喀爾
喀游牧少加展放在安設內卡之扎卜堪等處
百里游牧仍在原定界內應如所請令額駙策
凌與喀爾喀副將軍等將喀爾喀游牧指定何

處起止不許踰界仍令烏里雅蘇台參贊大臣
不時巡查遇有越界游牧者查出從重治罪令
將地名造冊存在軍營以備稽查并移咨該部
查核奏入

上從之

壬子

定邊副將軍額駙策凌奏報巡查邊境情形
策凌奏言往南路略地之二等侍衛棟樑於八

月十二日出喀勒占和碩卡倫前往尋踪瞭望
見巴顏珠爾克地方有厄魯特扎勒巴克泰告
稱我八人現在察罕布爾噶蘇地方坐卡我小
台吉烏勒木濟帶領一百兵在察罕郭勒地方
駐劄棟樑責以此非爾等地方不當在此居住
扎勒巴克泰對以即刻移去又差協理台吉喇
嘛扎卜等帶兵前往尋去年所埋木記至敦達
都沙扎海見厄魯特得木齊索諾木塔克巴與

圖魯孟克等喇嘛扎卜告以不當近我境居住
索諾木塔克巴等應諾棟樑等埋換新木記而
回往中路略地之藍翎前鋒布勒善協理台吉
丹津叅領索爾蘇前往尋踪至花蘇魯克及沙
喇努魯等處遇見厄魯特烏梁海在彼打牲丹
津等斥責其非烏梁海等應諾而去丹津等埋
換新木記而回並無別事奏入報

聞

癸丑

準噶爾部人巴桑等來降

命賞給安插如例

冬十月丙寅

賜勅密諭西藏郡王頗羅鼐

上諭頗羅鼐曰達賴喇嘛看茶之綏綑喇嘛扎克巴達顏將爾鎮壓經書寫人桑寨拿獲爾從傳清之言將此事如同無事從輕完結經傳清奏聞扎克

巴達顏係達賴喇嘛服役之人惟恐關係達賴喇
嘛如此辦理甚合機宜達賴喇嘛係執掌闡揚西
方佛教之人爾係約束管理藏內人衆之人爾二
人同心協力以安地方使土伯特向化一應事務
皆賴爾等辦理朕視爾二人俱屬一體從無畸重
畸輕之見若爾二人稍有不合以致地方不寧甚
負朕信任期望之恩再朕知鎮壓左道斷不能有
損於人即以近事而論扎克巴達顏四五年前將

爾鎮壓此時朕先將爾子封為長子又加恩封長子為鎮國公並施爾恩典甚重豈非不能鎮壓之明效大驗乎觀此爾可以無疑矣爾平日感激朕恩勉力報効克副委任朕所深信是以並未明降諭旨特手書此勅密諭開示爾其知之

辛未

甘肅巡撫黃廷桂奏報準噶爾夷人在肅州貿易情形

先是黃廷桂奏言夷目賚木瑚里帶領夷人及牛馬貨物於六月十六七等日陸續到肅俱已安頓居住其原來羊隻於夷目等未曾進關之前即委文武員弁帶領商販出口迎買講明每綿羊一百隻內搭山羊五隻仍照往例每隻價銀一兩一錢以貨易貨夷人樂從於六月初八初九兩日收買完竣各項皮張牲畜約共值銀六萬餘兩夷人索價甚高又要四成現銀臣現

在遵循往例止令許給二成現銀若任其所欲
添給四成恐致夷人將來引為成例難以拒絕
奏入報

聞至是黃廷桂又奏言據肅州鎮臣許仕盛甘肅道
鈕廷彩稟稱夷人各項皮張貨物俱經收買完
畢伊等所需銀貨亦已交兌明白臣查此次夷
人攜來牛羊馬匹皮張等項貨物共價銀九萬
五千九百二十餘兩惟貂狐豹三項皮張內搭

給二成現銀九千五百四十餘兩其餘俱以內地紬緞等貨抵兌交易該夷等事竣現在回巢訖又安西提督李繩武奏言貿易夷人自肅起身經肅州鎮臣許仕盛派肅標官兵伴送至橋灣臣即派靖逆協標都司錢璽昭例帶兵前往橋灣臣標中營守備陳文現帶兵前往坡子泉接遞護送據夷目賚木瑚里告稱此次買賣原係應進京年分荷蒙

大皇帝天恩准在肅州就近貿易甚為便益我等衆人仰戴

大皇帝恩德實屬感激不盡等語奏入俱報聞

乙酉

準噶爾部人達什哈來降如例

賞給發往青州隨其弟西喇口安插

十一月壬寅

命准準噶爾貢使赴肅貿易

安西提督李繩武奏言準噶爾夷使瑪木特於
十月二十三日到境據稱帶有馬匹貂皮等物
欲赴

大皇帝前請

安進

貢但攜帶駝馱牲畜貨物甚多查定例進
貢夷人不準攜帶買賣其從前進

貢夷人所帶牲畜貨物准其赴肅交易者實由我
皇上柔懷遠人恩施格外此次夷使瑪木特帶來駝
獸牲畜甚多到哈密後勢必復懇到肅州交易
其可否准照所請之處理合請

旨遵行奏入得

旨彼從遠路而來可告以朕恩所攜貨物姑准前赴
肅州貿易以後似此多帶不准交易之處俟夷使
到京當令大臣面諭該夷使等遵行也

十二月丙寅

準噶爾部人巴爾布達什來降

命賞給安插如例

命自準噶爾脫回內扎薩克蒙古人等不必解送京師

辦理軍機大臣等奏言近年辦理準噶爾脫回之喀爾喀人等經將軍詢問情節即由軍營解回各游牧安置其內扎薩克蒙古人等俱解送

京師交臣等詢問仍送回各游牧查內扎薩克
各旗俱在口外離軍營甚近令解送來京復行
解回各游牧徒多往返之勞應將脫回之內扎
薩克蒙古人等令額駙策凌詢問情節無庸解
送京師亦照喀爾喀之例由軍營解回本游牧
安置奏入

上從之

癸未

夷使瑪木特等至京進表請

安並貢方物

準噶爾台吉策妄多爾濟那木扎爾謹奏

大皇帝使者哈柳等前來奉

大皇帝恩旨無分內外一視同仁但願普天之下生
靈各得安生因爾父遣人赴藏念經懺悔於理甚
宜朕仍照從前施恩派人照管資助牲畜盤費並
特恩賞銀滿達茶桶茶喇紅黃香一百束并大手

帕一百件小手帕一千件茶葉一千包令在邊界
領取感戴

鴻恩歡欣無既今念經人三百名約於明年九月十
五日前後可到哈集爾等處但前往唐古忒地
方人內有帶去貨物俟貨賣後始往念經者有
即將貨物帶往念經者其將貨物帶往念經之
人懇令同在哈集爾得卜特爾過冬俟貿易人
由東科爾貿易回歸在哈集爾得卜特爾會齊

一同前往念經以廣黃教以安生靈伏乞

大皇帝睿鑒其繁瑣言語令來使口奏謹具馬二疋
橐一隻貂皮四十張聊申微悃奏入報

聞復

命尚書海望等訊問來使所欲口奏何語據瑪木特
稟稱我等前往西藏一切舉行善事念經之人
其施恩照管及賞助牲畜之處伏乞憐念再念
經之事需銀甚要我等前往東科爾貿易之人

交易時乞飭令內地商人以銀收買伏祈轉奏
海望等言我

大國交易之例聽商自便難用官法抑勒從前已
經曉諭爾等今爾台吉以念經之事需銀甚多
復行懇求俟轉奏候

旨奏入報

聞

乙酉

召見夷使瑪木特等於

雍和宮大和齋並令觀步踏

上諭之曰爾台吉奏疏朕已覽閱一切事宜皆遵奉
朕諭旨辦理看來如此恭順必能安伊屬人裨益
部落朕甚嘉悅再爾口奏之事特為乞求照看爾
等念經之人資助牲畜盤費此事自照前次賞賜
之例加恩賞給再懇求貿易時用銀收買爾等貨
物此事止可隨商賈之便朕不便降旨於商人此

次現派侍郎玉保前往照看爾等爾等與玉保商議酌量凡事屬可行者會議具奏瑪木特等瞻仰

行禮

賜茶跪領祇聆

聖訓畢退出翊曰

上復命尚書海望等宣諭瑪木特等曰爾等意欲頗羅鼐資助念經人等頗羅鼐雖係承受朕封號之人究係別部落不比內地臣民彼資助與否朕不

便降旨應聽伊自願故特諭爾等知之

己丑

侍郎玉保疏奏酌議夷使赴藏貿易事宜

玉保奏言據夷使瑪木特告稱

大皇帝恩旨藏內貿易事務著與玉保商酌辦理故我等特來與大人商酌我等明年九月十五前後至哈集爾得卜特爾卡倫若在卡倫即準貿易得帶銀兩入藏於事有益前歲我進藏人等

於夏間由噶斯一路而來因遇蚊蠓馬畜倒斃甚多此次前來過蚊蠓時計九月十五前後至哈集爾得卜特爾卡倫前往東科爾貿易往返計需三月所以奏明懇在彼處過冬若在哈集爾得卜特爾貿易得銀十月十五前後未知可否進藏臣告之云汝等在卡倫貿易只云帶銀前往除銀之外有無應買手帕茶葉緞匹等物以便傳我貿易人等豫備貿易據瑪木特云銀

兩之外別無應買物件臣告之云汝等於九月十五前後至哈集爾得卜特爾貿易十月進藏亦可但據我看來汝等與其九月十五前後前來不若於八月初十內外至哈集爾得卜特爾貿易帶銀於九月初間進藏未至大雪於汝等有益瑪木特云我台吉已經奏明我等難以專主容我歸告台吉若如我等所議則四月間差人至哈密送信若仍如原奏即不復差人等語

奏入報

聞

平定準噶爾方略前編卷四十九

欽定四庫全書

平定準噶爾方略前編卷五十

乾隆十二年春正月壬辰

賞辦理夷使赴藏事務侍郎玉保路費銀二千兩

乙未

賜準噶爾使臣瑪木特等宴於豐澤園禮成隨

頒賜準噶爾台吉策妄多爾濟那木扎爾粧緞等物

如例

丙申

賜準噶爾使臣瑪木特等緞布銀兩冠服有差

乙卯

賜準噶爾台吉策妄多爾濟那木扎爾勅書

奉

天承運

皇帝詔曰閱爾奏書爾能仰體朕加恩之意諸事俱遵旨辦理如此恭順必能安爾屬下利爾部落朕

深為嘉悅所奏往西藏念經人等有俟貿易後始
往念經有即將貨物帶往念經者俱懇在哈集爾
得卜特爾過冬俟貿易人由東科爾回歸會齊同
往之處已俱照所請行至爾使臣瑪木特口奏念
經人需用牲畜祈降旨頗羅鼐令其協助東科爾
貿易時俱令以銀兩交易等語頗羅鼐雖受朕封
號究係遠方部落之人非內地臣民可比其資助
與否朕未便降旨至需用馬匹口糧朕自加恩照

前賞給即頗羅廩此次或多為資助亦未可定至貿易人等銀貨交易止可各從其便不便以官法抑勒但爾既特行奏請亦非甚難行之事現在照看爾使臣前往仍派侍郎玉保已令玉保與爾使會商計議而行爾使回時自能詳告也嗣後爾宜益加敬慎永歸和好以體朕廣教安民之至意特勅付來使齎回隨勅賜各色緞十端粧緞十端玻璃瑤瑯磁器十八事

準噶爾使臣瑪木特等自京起程還部

二月丙寅

豫籌夷使進藏熬茶事宜

辦理軍機大臣等奏言此次準噶爾夷使往藏熬茶仍由噶斯路行走其卡倫應添兵展放並豫先搬移青海衆蒙古眷屬等事應交與副都統銜衆佛保照乾隆八年例辦理至賞助來使口糧仍照前次賞給之數豫備牛羊米麪等物

來使馬匹有罷乏者酌量賞給伊等若留罷乏
牲口派官兵牧放再賞給所留人口糧官兵馬
匹若有罷乏者於豫備駝馬內換給即將罷乏
牲口交地方官牧放豫備回時更換以上諸項
請交侍郎玉保亦照八年例辦理前次備往接
濟馬匹口糧銀三萬兩餘剩一萬兩此次應動
銀二萬兩交侍郎玉保帶往至回時核實報銷
再乾隆八年來使在東科爾貿易事畢始啟行

入藏故派西寧綠營兵三百名令往卡倫留一
百名照看準噶爾留下人畜其餘兵丁照看來
使至東科爾後即令各回本營另派滿洲兵五
百名照看入藏此次夷使不至東科爾將貨物
就近在卡倫上貿易即由彼處入藏不需更派
滿洲兵請專派西寧綠營官兵照看來使留下
之人其至藏後往各廟行禮時亦需防範跟隨
之人請共派兵四百名交該督慶復選派總兵

官一員帶領前往若報來使於八月到卡倫令
派出官兵於六月內起程往哈集爾卡倫等候
若信息不到仍照伊等原奏九月方來令官兵
於七月起程其理藩院司官及筆帖式領催等
交侍郎玉保帶領於四月起程往西寧凡應辦
之項與衆佛保公同商辦再準噶爾此次在卡
倫貿易因伊等念經需費懇求以銀交易應比
前次帶往銀兩十七八萬兩之數略多豫備令

巡撫黃廷桂於府道大員內揀派賢能之員曾經辦理貿易事務者前往辦理奏入

上從之

丙戌

命駐藏副都統傅清覆奏郡王頗羅鼐意見情形

上諭軍機大臣等曰據駐藏副都統傅清摺奏郡王頗羅鼐告稱部中叅奏言其挾有私意殊屬屈抑又以部院與伊不合因有疑惑等情或係伊意中

果有委曲怨望情形或因部叅語重伊心畏懼思改已過殊未明晰頗羅鼐係彼處辦事之人伊所陳訴俱有關係理宜留心查察詳細具奏傳清此摺詞意甚屬含糊況伊應辦事務俱不留心惟事偷安繕寫奏摺俱甚潦草著傳諭傳清將頗羅鼐意見情形據實奏聞再上年十二月內曾降勅密諭頗羅鼐計其時日在傳清未奏此摺之時早已接到頗羅鼐見此旨後作何言語傳清此次因何

並未奏聞著一併傳詢令其覆奏

己丑

駐藏副都統傅清奏報拉達克汗策卜登那木
扎爾訪察準噶爾情形

傅清奏言正月初九日據郡王頗羅鼐告稱我
囑令拉達克鄂勒錐圖汗策卜登那木扎爾遣
彭蘇克與其屬下等共七人充作貿易前往葉
爾羌等處體察準噶爾情形今彭蘇克等已回

據云到葉爾羌等處時有葉爾羌回子頭目喚
去訊問天竺巴巴咱汗及土伯特藏信息我等
告以藏內現蒙

大皇帝恩甚屬平安我等係多木津地方之人機密
事不能深知彼處聞言疑惑發往準噶爾居住
半年我等因將彼部內情形細加採訪訪得前
年八月噶爾丹策零病故遺言令次子策妄多
爾濟那木扎爾坐床將長子喇嘛達爾扎分路

一千餘戶令各自管轄其後令哈柳為使進京
於上年六月回巢稱

大皇帝隆恩甚厚許令進藏熬茶又准走喀喇烏蘇
一路不勝欣喜又訪得策卜登台吉已獲罪被
殺並其妻子及其叔父郭莽堪布喇嘛皆被殺
郭莽堪布喇嘛之缺已令扎什倫布之阿克巴
喇嘛補授阿克巴喇嘛之缺已令羅卜藏丹怎
補授策妄多爾濟那木扎爾之姪女許與拉藏

汗之孫納噶查為妻現在彼處所最重者是納沁宰桑察罕宰桑巴雅斯瑚朗宰桑小策零敦多卜固子宰桑等但因其台吉已亡而新立台吉年幼用事之人彼此不和惟恐阿卜都爾噶里木哈薩克土爾扈特喀爾喀等處發兵襲之所以防範卡倫甚嚴等語奏入報

聞

三月乙巳

卹賞故西藏郡王頗羅鼐以其子朱爾默特那木扎

爾襲封郡王辦理藏務

上諭內閣曰據副都統傅清奏稱郡王頗羅鼐病故頗羅鼐任事以來克盡忠誠實心効力今聞溘逝深為軫悼著加恩於彼處收貯錢糧內賞銀一千

兩料理喪事例應遣大臣致祭著派索拜前往祭奠應行卹典該部照例查奏朕從前因念伊奮勉肫誠降旨令頗羅鼐保奏一子承襲封爵據頗羅

鼐以次子朱爾默特那木扎爾堪以効力具奏業
加恩封為長子今辦理藏衛噶卜倫事務之人即
將伊子朱爾默特那木扎爾襲封郡王但年尚幼
小甫經襲爵辦事噶卜倫等務如頗羅鼐在時同
心協力黽勉辦理著傳清將此旨通行曉諭知之

命駐藏副都統傳清體察西藏情形加意辦理

上諭軍機大臣等曰西藏地方關係甚要頗羅鼐經
事練達下人信服伊亦能奮勉効力諸事無庸置

念今頗羅鼐已故雖命伊子朱爾默特那木扎爾襲封總辦藏衛事務而藏地素屬多事衆心不一值朱爾默特那木扎爾年幼新襲之時未必即能如頗羅鼐收服衆人之心頗羅鼐在時凡事俱由伊主張不過商同傳清斟酌辦理今非頗羅鼐時可比著傳清逐處留心訪查如有朱爾默特那木扎爾意見不到之處即行指示不得稍有疎忽再上年有達賴喇嘛屬下人鎮壓頗羅鼐一事

伊等彼此已露不和之意今頗羅鼐暴歿朱爾默特那木扎爾或念伊父動生猜疑與達賴喇嘛不睦或達賴喇嘛又信人言即照所行於頗羅鼐者行之於朱爾默特那木扎爾則更有關係傳清於此兩人善為和解惟期地方安靜不生事端伊等彼此和好屬下人即有奸詐者亦不能滋事矣頗羅鼐總理藏務多年皆因能用其屬下可信之人凡事始皆妥當朱爾默特那木扎爾宜令其用伊

父信用舊人協力料理方為有益再今歲準噶爾
又往熬茶恐其聞頗羅鼐已歿彼處無總理之人
任意藉端造言生事亦未可定亦當留心防範凡
應備辦牲畜口糧等項務須豫為儲備至照看來
使之侍郎玉保係前次承辦之人一應事宜俱宜
會同商酌務期妥協現在頗羅鼐歿後彼處衆人
情形若何即應奏聞乃並未具奏殊屬疎忽此際
彼處衆人意見情形及朱爾默特那木扎爾襲爵

辦事後各處人心輸服與否俱著一一加意體訪
具摺奏聞倘有一二不肖滋事之人亦著傳清即
行酌量辦理以示警戒

丙午

命古北口提督索拜赴藏與副都統傅清同辦藏務
安西提督李繩武奏報準噶爾使臣瑪木特等
出境

己酉

軍營叅贊大臣副都統保明期滿以副都統那
蘭保往代

夏四月壬戌

籌議藏地防範事宜

駐藏副都統傅清奏言從前阿里克地方原係
頗羅鼐長子公朱爾默特策卜登駐劄管轄嗣
因染患足疾

奏明回藏調養茲頗羅鼐病故阿里克地方緊要

伊足疾亦已漸愈臣即令其仍赴阿里克防範
地方卡倫據公朱爾默特策卜登告稱請俟伊
父建塔完竣即行前往再騰格里淖爾喀喇烏
蘇等處每年夏季令朱爾默特那木扎爾領兵
駐防今因伊父病故朱爾默特那木扎爾留藏
辦事臣令其派親信宰桑那旺根敦管轄喀喇
烏蘇之兵策凌達什管轄騰格里淖爾之兵無
庸俟至夏季先期前往駐劄再從阿哈雅克卡

倫起至阿里克地方止每卡俱添兵三十名用心防範其巡察阿哈雅克卡倫派扎薩克頭等台吉旺對前往奏入得

旨軍機大臣會同索拜議奏尋議阿里克地方甚屬緊要與拉達克連界今頗羅鼐病故正宜防範應令公朱爾默特策卜登親身前往方為有益再騰格里淖爾喀喇烏蘇等處朱爾默特那木扎爾既留藏辦事即令其派出親信宰桑等前

往駐劄防範務期加意體察其阿哈雅克等處
卡倫添兵巡察及委派專管之處俱應如所奏
辦理再據公朱爾默特策卜登等奏伊父頗羅
鼐遺言摺內報出喇嘛噶津林沁病故噶津林
沁久住準噶爾地方回藏之後交與頗羅鼐看
守防範今已七十餘歲久經患病其言似無虛
捏但正當頗羅鼐病革之際而看守之人指稱
伊已病故略覺可疑恐朱爾默特那木扎爾為

其屬下所蒙亦未可定應令索拜到彼留心體
訪具奏入報

聞

乙丑

駐防哈密總兵官王能愛奏報詢問夷使言語
情形

王能愛奏言臣於二月內欽奉

諭旨以準噶爾使臣瑪木特來京會議貿易熬茶事

務伊等原奏明於九月中旬前來經玉保令其於
八月初旬到哈濟爾得卜特爾貿易九月初即行
進藏瑪木特等因已經伊台吉奏明未便遽定俟
歸告台吉若如所議當於四月內遣人至哈密通
信若照前奏即不送信可傳諭王能愛令於夷使
回巢經過時將何時遣人確切詢明具摺奏聞臣
於三月十一日接見夷使遵

諭旨事理詢問瑪木特據稱進藏熬茶之事已蒙

大皇帝俞允我台吉原奏明於九月十五前後到哈
濟爾得卜特爾地方貿易完畢進藏念經經

天朝大臣等仰體

大皇帝體卹之恩令於八月初旬前來九月間進藏
天氣溫和行走便利此實有益我等之事我是
以急欲回去酌定日期以便前來報信現在即
欲啟程懇由烏克克嶺行走路途較近並有疲
乏馬匹懇求換給數匹必得於四月十五前回

到伊犁方不致誤事臣問以四月十五前方到伊犁報信人如何即能於四月內得到哈密汝須約定準期我在此等候呈報據夷使云我到伊犁定期後遣報信人來揀選好馬由我處卡倫晝夜兼行四月內必到哈密或仍照原奏於九月內前來即不送信臣諭以即使九月前來亦應送信為是據夷使云若仍九月前來送信與否當稟知台吉而行我亦不敢主張臣察具

言詞及沿途行走甚緊其意亦欲於八月內前來是以急於回巢已照例護送出境奏入報

聞

甲戌

籌辦夷人貿易進藏事宜

甘肅巡撫黃廷桂奏言本年九月內準噶爾夷使進藏熬茶蒙

聖恩允准除已有成例者俱照乾隆八年之例備辦

外惟是前次係在東科爾交易今次由哈濟爾
易銀前往所有應行隨時酌辦之處悉心逐一

酌議恭陳

聖鑒一夷人在哈濟爾易換銀兩不需貨物

廷議令較上次交易之數略為多備查上次交易
用官銀七萬八千餘兩今酌量豫備交易銀十
六萬兩進藏備用銀二萬兩又料理官兵口糧
鹽菜應賞俸餉運送腳價等項約需銀十五萬

兩除八年熬茶案內剩銀三萬餘兩外尚應需銀三十萬兩請先在甘肅藩庫內撥用仍於隣近省分速撥解甘還項一上次運糧及通信綠旗官兵口糧鹽菜俱係從寧裹帶今次護送夷使派出綠旗官兵同行全資馬力未便攜帶口糧以致遲累除從寧赴卡由藏回寧令其自行攜帶外其由哈濟爾進藏時所需口糧三個月鹽菜六個月應照上次滿洲官兵例撥兵運送

其到藏駐劄及留牧兵丁並運糧兵丁仍照上次之例辦理一防護綠旗兵丁於賞銀外每名請借支半年餉銀至綠旗官員照例賞給一年俸銀均不敷用請酌借總兵銀五百兩遊擊都司二百兩守備一百五十兩千把總八十兩於回營之日在俸餉內分季扣還一乾隆八年夷使至東科爾貿易奏明賞給食物三次今次仍請於哈濟爾侯夷使初到時賞給一次外其二

次賞給應請於卡倫交易事畢起身進藏時令
照看夷使之侍郎玉保等宣布

皇上隆恩再賞一次熬茶事畢回巢時仍在附近青
海之處賞給一次其應賞物件

廷議令備牛羊米麪等物查乾隆八年准侍郎玉
保咨明將牛羊米麪酌換茶奶酥油賞給今應
仍照前例辦理奏入得

旨軍機大臣議奏尋議上次交易用銀共二十三萬

餘兩此次在卡倫貿易零星貨物俱需官買自較前次之數有加是以臣等議令略為多備今該撫酌定帶銀十六萬兩量已敷用其官兵口糧及備帶銀兩共估需銀三十餘萬兩應照所請即行動用

勅部酌撥補還再前次護送滿洲官兵口糧俱另撥官兵護送綠旗兵丁口糧則令自行裹帶此次護送夷使綠旗官兵若照舊例概令自行裹帶

誠多未便亦應照該撫所請除從寧赴卡由藏
回寧外俱照滿洲官兵例撥兵運送其到藏駐
劄及留牧運糧兵丁俱照前例辦理至上次護
送夷使進藏綠旗官弁賞一年俸銀馬兵賞銀
十兩步兵賞銀六兩與滿洲官兵之例不同但
此次綠旗官兵係護送夷使往藏長途跋涉未
免拮据應悉照該撫所奏數目借給回營之日
按季扣還其三次賞給夷使並備用黑茶酥油

白麪等物之處均應如所請辦理奏入

上從之

丁丑

命副都統銜巴爾品赴軍營効力

上諭內閣曰那蘭保不必前往軍營著調補熱河副都統巴爾品著革職賞給副都統銜自備資斧前往軍營効力三年再行請旨

五月壬辰

飭禁買馬兵民私越卡倫

辦理軍機大臣等奏言從前甘肅一帶所需營馬原由金塔寺出口往喀爾喀等處採買乾隆七年肅州鎮臣遣人遠赴額爾得尼招附近軍營買馬額駙策凌恐其滋事報部禁止嗣經總督慶復議以每年定限給票不得濫往並指明地方甘肅各營由金塔寺口外行走安西各營由布隆吉爾西喇呼魯蘇一路行走在北路喀

爾喀蒙古庫倫恰克圖一帶購買業經部議覆
准今安西提督李繩武奏買馬弁兵經過圖古
里克遇見準噶爾脫出蒙古孟克一名等語查
買馬弁兵不遵原奏擅赴圖古里克其地在哈
密卡倫之外與準夷邊界相通誠如

聖諭彼處人可從此逃來則內地或有不肖之人亦
可從此潛往將來買馬之人由此經過未免滋
釁應嚴加防範以肅邊境除甘肅各營出金塔

寺口者仍照原議亦不得至哈密卡倫外其安
西各營即在附近西寧一帶採買不得遠至喀
爾喀即或需往喀爾喀蒙古等處採買亦令在
卡倫以內行走其圖古里克一帶及哈密卡倫
外行走之處永行禁止奏入

上從之

已酉

安西提督李繩武奏報夷使赴藏熬茶日期

李繩武奏言本年五月初五日準噶爾夷使奔塔爾來至哈密報赴藏熬茶的期據稱我宰桑瑪木特於四月初六日回至伊犁告台吉策妄多爾濟那木扎爾云進藏一事蒙

大皇帝恩准令於八月初十日前後到哈濟爾及早進藏我台吉不勝感激給我字單令我先來報信隨將所送字單譯出內稱往西邊念經熬茶之人定於八月十五前後致哈濟爾約共三百

人宰桑四人一瑪木特一吹納木喀一巴雅斯
瑚朗一圖魯庫喇嘛三人一綏綳一溫都遜一
固尼爾等語奏入報

聞

庚戌

定邊副將軍額駙策凌疏奏暫停派閱看喀爾
喀軍裝

策凌奏言今年正當喀爾喀四部落大會之年

又遇閱看軍裝之期應派參贊大臣稽察喀爾喀四部落所備軍裝但盟長與各扎薩克帶領人衆兩次豫備未免煩費請照乾隆八年之例將閱看軍裝事暫停派參贊大臣前往即交副將軍及盟長等令其在各游牧處查看奏入報聞

定邊副將軍額駙策凌疏奏減撤喀爾喀防秋兵

策凌奏言定例每年派喀爾喀兵三千名於秋間來至軍營操練防範今軍營無事各蒙古力量應加體恤請裁減兵一千名奏入得

旨軍營現在無事操練防範之兵原不必如此之多所奏是依議

已未

定議進藏沿途卡倫臺站事宜

軍機大臣奏言據侍郎玉保等奏稱乾隆八年

準噶爾來使入藏熬茶由噶斯路行走於來使
到時將伊克柴達木得卜特爾兩卡倫展設於
哈濟爾察罕烏蘇派出西寧綠營兵一百名今
年來使仍由噶斯路應照八年之例辦理等語
應如所奏交與西寧總兵官張士偉派兵一百
名與蒙古兵同在哈濟爾等處展放卡倫再乾
隆八年侍郎玉保帶領準噶爾之人赴藏因沿
路未設臺站凡奏摺傳事俱從四川馳遞不但

路途遠遠若有候

旨辦理之事必致遲悞今次應請於現派出卡倫蒙
古綠營兵丁內酌量派五六十名交玉保進藏
時帶往自哈坦和碩至喀喇烏蘇暫安臺站遇
有緊急事務沿途遞送俟準噶爾人回巢後仍
行撤回奏入

上從之

六月癸亥

籌議夷使進藏熬茶添兵防範事宜

駐藏副都統傅清奏言夷使赴藏熬茶各緊要
地方俱應添兵防範所有阿哈雅克騰格里淖
爾一路地方前次派兵六千令朱爾默特那木
扎爾防守今朱爾默特那木扎爾既留藏辦事
其地已派宰桑那旺根敦策凌達什在彼管轄
應即交與伊等防範駐守至準噶爾進藏之時
臣另派噶卜倫策凌旺扎爾等前至喀喇烏蘇

帶兵三百名護送至藏其防守阿里克一路已
令公朱爾默特策卜登前往仍照前次帶兵五
千名在彼駐劄又查工布與達克布及藏內地
方其備過兵四千名臣仍照數防備現在調用
兵共一萬五千名再從準噶爾至藏路徑甚多
共有五處每處俱須安設卡倫每卡俱派兵一
百名頭目一名令其小心偵探又歸併藏內之
那克素三十九部落番子原係羅卜藏丹津屬

下之人罔知法紀聞夷使入藏難保其必無生
事之處應於夷使將到時令其游牧移至別處
以避其路仍派人約束照管暗行防範其準噶
爾人等往各寺廟熬茶之時仍派官兵與原護
送之官兵一同約束並密飭各寺廟喇嘛之處
已俱交朱爾默特那木扎爾小心辦理奏入得
旨軍機大臣議奏尋議準噶爾往藏熬茶因係奏明
為伊父修行善事是以蒙

恩俞允而藏內之人慮其狡詐不敢輕信防範豫備
自不可忽但調兵至一萬五千不免聲張耳目
且準噶爾此次尤極恭順諸事俱遵

旨而行應外示以寬和之

恩而從中暗行防範以備不虞現在調兵太多不但
勞費無益反恐伊等聞知轉生疑懼應令傳清
酌量豫備調兵數千名於緊要各處嚴行防守
尤當行所無事不涉張皇方為妥協一切與郡

王朱爾默特那木扎爾公同商酌相機辦理至
將那克素各處番子於準噶爾將到時約束搬
移以及密飭各寺喇嘛之處俱應如所奏辦理
奏入

上從之

籌辦赴藏大臣官兵等米糧事宜

駐藏副都統傳清奏言前次準噶爾赴藏熬茶
管送之大臣官兵等所用米糧動用庫項採買

二千三百餘石後實支用九百餘石所餘米石
作為駐藏官員兵丁口糧現已無存此次應較
前次量為減少豫備二千石再管送之大臣官
兵及準噶爾熬茶人等所用之柴草奶油茶葉
炒麪等項應酌量豫備之處交朱爾默特那木
扎爾妥協豫備其用過銀兩即於彼處收貯錢
糧內照數支給奏入得

旨軍機大臣議奏尋議此次管送之大臣官兵較前

次為數既少上次止用過米糧九百餘石則此
次豫備二千石尚屬過多採買輓運不無勞費
相應飭令採買一千石以備支用其草料等項
應如所奏豫備事竣核實報銷奏入

上從之

戊辰

定防範逃人事宜

定邊副將軍額駙策凌奏言所有交與和托輝

特公額林沁安插約束之投誠準噶爾烏梁海
泯達遜一户私自逃回旋經掣獲已將泯達遜
等正法其子索雲解送理藩院照例辦理奏入
得

旨著查明由準噶爾投誠交與各扎薩克地方安插
之烏梁海等共有若干人將如何防範不令逃回
之處軍機大臣等議奏尋議由準噶爾陸續脫回
及投來欲歸親族之厄魯特烏梁海及回人等

共五十起二百二十一名口俱由軍營詢明情節

奏明交與各該旗安插今祇達遜一戶無故私自

逃回則此投誠人內未必無似此者應交額駙

策凌及提督李繩武令其密飭各該扎薩克等

嚴加約束並令各處坐卡人員不時巡查毋稍

疎懈至平日防範之處亦不宜顯露形迹過於

聲張致令伊等妄生疑懼惟暗中留心防範方

為妥協其解送逃人索雲一名俟到京之日交
與刑部永遠圈禁奏入

上從之

辛未

命兩路軍營大臣分別辦理投誠人等

上諭軍機大臣等曰提督李繩武奏稱詢問自準夷
投來之厄魯特巴雅爾據稱伊係去年隨同來使
瑪木特前來之人回巢時因副使都喇勒哈什哈

出痘令伊調治未愈身死瑪木特不令伊同行都喇勒哈什哈從人又欲將伊加害兩次向家逃歸在路被獲今又乘間逃來等情應將巴雅爾照例辦理送至京師等語此人係近日隨來使到京之人又有逃回兩次被獲情節今投順前來彼處斷無不知非從前投誠之人可比李繩武應具奏請旨辦理乃即向伊詳問彼處一應事宜信息送至京師辦理甚屬不合但此時若再令回歸伊必備

細歸告緣由反令彼處疑惑致生事端此案著即
照此完結朕思屢收此等投誠之人竟無裨益從
前用兵時尚欲得其信息方今罷息干戈伊等甚
屬恭順來使交易往來並無事端得其信息與否
無甚關係且此投誠人內大抵皆沿邊居住或幽
僻處所者居多彼處要緊大事未必稔知即伊道
聽之言亦難憑信假如一人前來謂彼處有進兵
之信可即信其言遽爾出征乎亦不過照原先定

議固守疆界耳現今將若輩收留安插不但需費繁多將來辦理亦費周章但原定疆界時並未有彼此不留逃人之語不便將投來之人即行拏解伊處嗣後如有投至卡倫者務須問明逃時曾否有人知覺或有無追拏之處如有前項緣由不必詳問彼處細事即諭以現今和好爾台吉甚屬恭順大國施恩不比從前汝國逃來之人不便收留若即拏送又恐致汝受罪可即自行投回明白曉

諭不必令進卡倫倘自彼處來時無人知覺又並無追拏等情問明後送至軍營聽候辦理可密諭兩路軍營大臣等知之

戊寅

命郡王朱爾默特那木扎爾酌量資助熬茶人等牲畜口糧

上諭軍機大等等曰此次準噶爾使臣瑪木特來京奏稱從前伊處赴藏熬茶人等頗羅鼐並未照舊

例幫助牲畜口糧等語經朕以頗羅鼐雖係受封號之人究屬遠方部落非內地臣民可比不便降旨令其資助但此次或較前量加資助亦未可定詳悉曉諭該夷使等並於玉保前往時令其向朱爾默特那木扎爾公同商酌妥協辦理著再傳諭傅清令其轉諭朱爾默特那木扎爾此次夷使到藏時雖毋庸循照舊例二十日即行辦給一次著於初到資助之外酌量駐藏日期多寡再行辦給

一二次俾夷使等咸知感悅

安插準噶爾烏梁海扎勒布

辦理軍機大臣等奏言雍正十二年內北路軍營將等獲準噶爾烏梁海宰桑鄂魯什野勒之子扎勒布解送來京奉

旨著將扎勒布暫且留養俟後來再定業經留養在聖華寺內至今十有餘年年近三十前因軍務未竣是以未經請

旨定奪今準夷恭順軍前寧謐扎勒布毋庸看守又不便發回游牧請照投誠厄魯特給與娶妻立產銀兩照例安插奏入報

聞

丙申

定邊副將軍額駙策凌疏奏撥解軍營備貯銀兩

策凌奏言現在軍營一年需用錢糧約計一十

萬兩有零自乾隆十年十月內解到銀二十五萬兩陸續支放外尚存貯銀一十二萬兩有零足支一年之用而軍需錢糧理應豫備請將乾隆己巳庚午兩年應用銀二十二萬兩及備用銀三萬兩一併解交軍營以備應用奏入上從之

秋七月己酉

命移金塔寺回衆于哈密安置

上諭軍機大臣等曰肅州金塔寺安插吐魯番回子
內有不服水土至於生計艱窘者一百餘戶經大
臣等議奏請移于哈密種地居住此項回衆向被
準夷凌虐情願移入內地迄今二十餘年因水土
異宜積蓄者少窮迫者多若將伊等移于他處究
不能于生計有益哈密吐魯番雖部落各異其教
則一情性相宜且哈密貝子玉素富自伊曾祖額
貝都拉塔爾罕伯克以來數世受國家恩澤竭誠

報効奮勉急公教養所屬之人亦甚妥協現在哈密地方尚有可種餘地著將安插金塔寺回衆交貝子玉素富併入伊所屬旗分佐領加意撫卹令新舊回衆和好如一撥給餘田令其耕種俾永遠不致失所將此傳諭貝子玉素富知之

丁巳

准暫停青海王公等巡察卡倫

軍機大臣奏言據侍郎玉保等奏稱每年春秋

二季巡察額色勒金柴達本兩路卡倫派定青海王公扎薩克台吉等每一路遣一人巡察卡倫又派莊浪滿官四員帶領兵丁每年於秋間巡察一次均應於九月間自西寧起程前往今值夷使進藏熬茶請暫行停止等語查準噶爾夷使赴藏熬茶侍郎玉保現已在哈濟爾駐劄倘巡察卡倫人等照舊前往正值夷使將到人多勢衆恐致夷使生疑反多不便應請將今秋

巡察卡倫之青海王公等並莊浪官兵俱暫行
停止俟明年春季仍照舊派往奏入

上從之

八月戊寅

準噶爾部人鄂勒錫尼瑪挈眷來降

命賞給安插如例

辛巳

訓飭綏遠城將軍補熙等

上諭軍機大臣等曰據額駙策凌奏稱綏遠城將軍補熙等遣佐領素爾芳阿前來軍營買馬經臣告知遣員汝等賣來俱係官帑途間萬一遇有賊盜關係非小不比客商既經遠來可到鄂爾昆買得牲畜即便回歸嗣後不可為例等語此事額駙策凌尚能籌及告知遣員補熙等辦理疎忽不知大體甚屬不合滋生銀兩雖應酬辦或在他處貿易或交商人領辦皆無不可特差官兵持銀遠赴軍

營貿易不特事理不宜設途中遇有宵小竊發更
於大體有關補熙等著傳旨申飭該副都統等曾
否與之商議究竟出自何人之意並著伊等明白
回奏

壬午

準噶爾部人博克來降

命賞給安插如例

更定軍營官員換班事宜

副都統保德奏言軍營侍衛官員拜唐阿等應
換班時隨伊等報滿日期更換未有定時但此
等換班人員一出張家口均係馳騎蒙古馬匹
若適遇冬春正值蒙古牲畜疲瘦之時應付馬
匹及供應食物未免拮据請將軍營換班人等
於五月半間自京起身換回之人於七八月間
來抵京城其差使來京者除有要緊事件外其
尋常賚送檔冊事件差使亦令俟五月起身於

九月間回至軍營再軍營換班若均在一年應換之人太多亦殊未便請將看水草侍衛部院衙門官員作為一年更換卡倫侍衛作為一年更換再口外行走惟工珠及珠爾惠兩路若換往之人由工珠一路行走則換回之人令從珠爾惠一路行走則換回之人路換班行走蒙古人等自不致於拮据奏入得

旨軍機大臣議奏尋議均應如所請辦理現在軍營

官員內有冬春應換者即照此奏俟於來年五月內更換其看水草侍衛向係新舊錯綜更換不便令與部院官員一時全換現在十員侍衛內仍留一半另作一次更換奏入

上從之

九月辛亥

命原任布政使安圖更替原任按察使劉柏辦理北路軍營糧餉事務

癸丑

命侍郎玉保覆奏夷使熬茶情形

上諭軍機大臣等曰據玉保奏準夷熬茶來使先遣
阿喇卜扎報知伊等至塔里木河因水大難渡不
能如原約於八月十五前後到來緣由又詢問此
處現派大臣幾員領兵若干駐劄何處各情由看
其光景似有疑慮等語此次準噶爾進藏熬茶諸
事皆允其所請又係伊等從前經過之事理宜無

所疑慮玉保此奏亦甚含糊並未詳悉聲明著即傳旨詢問若因伊遲悞約期預先遣人來報即料其有疑慮玉保尚屬曉事人不應如此或準噶爾人等違背約期自知食言遂有掩飾之意玉保即從此生疑亦未可定務將實在情形明白速奏以便豫行辦理朕思準噶爾人等素行詭詐難以憑信近又新襲台吉或借赴藏緣由窺我邊界且進藏熬茶離青海甚近藉端謀襲青海亦不可不慮

及凡一應豫備防範之處即令玉保會同地方大員密行商酌設法辦理倘伊等本無疑惑之形而內地稍露張皇之意反致伊等疑懼則更大有關係此事已令大學士慶復暫駐陝西豫行籌辦凡應行會商之事就近密商妥辦仍俟玉保覆奏到日再行酌量並將此旨寄慶復知之

命慶復留駐陝西密行防範

上諭軍機大臣等曰據侍郎玉保奏稱準夷熬茶來

使於中途遣阿喇卜扎前來告稱伊等至塔里木
河因水大難渡將約定八月十五日期不能到來
緣由先行報知又詢問此處現派大臣幾員領兵
多少駐劄何處各情形看其光景似有疑慮等語
準夷如何疑慮之處具奏不明已降旨詢問玉保
著將此摺抄寄大學士慶復閱看準夷向來不可
憑信策妄多爾濟那木扎爾新襲台吉往藏熬茶
離青海甚近藉端謀襲青海亦未可定自應防範

豫備現在玉保止領兵丁四百名提督李繩武遠
在西安總督張廣泗又駐軍營西寧等處並無大
員設或偶生事端亦屬可慮前令大學士慶復回
京必取道於陝西此時如已起程即令在陝西暫
住靜候玉保信息就近將一應豫防事宜暗為備
辦設有事端一面具奏一面辦理然不過先事豫
籌之計務宜加意慎密斷不可令夷使等稍有知
覺反生疑惑即內地人等亦不可稍露形迹致令

泄漏俟應令伊回京時候朕降旨再行回京

已未

命收留投誠人等毋得拘泥辦理

定邊副將軍額駙策凌奏言本年七月內有準噶爾烏梁海杭噶勒投誠前來經臣等詢問伊逃來時與一蒙古台吉額倫同逃額倫已被人拏回伊一人步至卡倫已遵

旨阻回嗣後除即行阻回者毋庸另議其有畏本處

治罪不肯回巢者臣等難以辦理請酌量照前
收留俟夷使進

貢來京時

特降諭旨將不容留逃人之處曉諭準噶爾台吉彼
必愈加感激

聖恩而臣等亦得遵循辦理奏入得

旨此次投誠之杭噶勒其情節並不與已雅爾相似
乃遽令阻回辦理殊屬拘泥嗣後有似此及必不

願回巢者仍著收留安插

冬十月己卯

侍郎玉保奏報夷使至哈濟爾情形

玉保奏言九月十四日準噶爾宰桑巴雅斯瑚朗瑪木特及喇嘛綏綢等帶領三百人來至哈濟爾告稱我等於六月初十日起程七月二十四日到塔里木河因河水泛溢不能即渡遲留守候故至今始到我等帶來貨物懇求大人等

照料貿易俾得攜銀入藏等語臣等當即將哈
濟爾卡倫一次賞給口糧傳

聖主恩旨散給來使訖臣於十五日帶領來使自哈
濟爾起身往得卜特爾貿易伏查準夷來使因
水發稽遲約於九月二十以後到得卜特爾地
方趕辦貿易事務約需一月至十月二十以後
起身十一月內方能到藏熬茶事畢已在來年
正月十五以後藏地風俗每正月初五日起至

二十九日止修好事念經各處人衆瞻拜聚集準夷賦性狡詐從中藉生事端均未可定臣意欲令及早竣事於正月初五以內帶領來使回巢倘初五內不能完竣則藏地聚集人衆隨到令其瞻拜不留久住庶可不致滋事奏入

上諭軍機大臣等曰前據王保具奏準夷熬茶人等因不能如期到卡豫先差人送信一摺內有伊等似有疑慮一語含糊具奏朕初以為果有別項事

端今據奏報宰桑巴雅斯瑚朗等三百人於九月十四日到哈濟爾現往得卜特爾交易等語是準夷並無異意可知又奏稱藏地風俗正月修好事念經各處人衆前來瞻拜商賈聚集甚屬擾攘恐準夷乘間滋事伊欲催促熬茶於初五日以內完竣即帶來使回巢如遲久不能畢事將內地人衆隨到瞻拜不令久聚等語此等意見又屬太過準夷到藏熬茶事畢即可回歸游牧但伊等見藏地

修好事念經必懇求多住數日瞻仰數次若遽催促起程并將內地聚集瞻禮人衆驅逐不令久聚使彼知覺反生疑慮至期惟有約束內地人等暗為防範不使滋事著寄信玉保帶領夷人至藏與駐藏辦事大臣索拜傅清等公同商議妥協辦理斷不可稍有疎忽亦不可使準夷知覺稍有疑惑因玉保之奏令大學士慶復暫駐陝西豫行防範令並無事故慶復即著回京並諭玉保知之

十一月己酉

允定邊副將軍額駙策凌奏請入

覲以塔爾瑪善暫駐將軍印務

乙卯

申諭兩路軍營大臣等酌收投誠人等事宜

上諭軍機大臣等曰據李繩武奏稱有準夷逃來之

巴顏庫車克等逃出時曾被人知覺又有追拿情

節理宜遵旨阻回但巴顏庫車克情極取出佩刀

意欲自盡苦求收留伏祈降旨訓諭等語朕從前降旨如有人投誠至卡倫時即將伊曾否遇見彼處之人及有無追拿情事詢明辦理特為此等投來人內有從前逃出被擒後復投誠者其中情節彼處人業已深悉是以令伊等詢問明白不令收留令巴顏庫車克等三人內一人經額敏和卓查明係伊屬下部落其無檔案可稽之二人亦稱係自幼被擄伊等雖非內地之人並無被獲復逃情

事而李繩武自應斟酌辦理乃堅持不受所謂因噎廢食固執太甚況哀懇迫切斷不肯回情亦可憫著傳諭李繩武令收留伊等照例辦理從前額駙策凌以投誠之杭噶勒曾遇見彼處之人即行阻回經朕批諭所辦甚屬拘泥再有似此不願回去者仍著收留今覽李繩武所奏伊等皆未能領會前降諭旨著將此再行傳旨曉諭兩路軍營大臣嗣後務須審度情形酌量妥辦不得仍前拘泥

丙辰

甘肅巡撫黃廷桂奏報夷使貿易情形

黃廷桂奏言據派出辦理貿易知府劉宏緒等稟報夷使等於九月二十一日至得卜特爾十月初四日將所帶皮貨議定價值挑收先經酌議豫備銀十六萬兩尚不敷用祈為酌撥臣即檄行西寧道楊應琚就近于道庫內動銀三萬兩量派弁兵於十月二十一日兼程運赴該處

備用訖奏入報

聞

甲子

準噶爾部人多爾濟巴顏巴克什都拜等四人
來降

命賞給安插如例

乙亥

侍郎玉保奏報夷使赴藏日期

玉保奏言十一月初七日準噶爾宰桑巴雅斯
瑚郎等告稱我等前次來至東科爾交易路遠
往返勞苦駝馬亦多倒斃此次熬茶蒙

大皇帝天恩在卡倫交易不勞往返駝馬亦無倒斃
今交易事竣我等身受

大皇帝洪恩感激不盡今欲於本月十三日起程進
藏大人帶領我等由何路行走臣告之云汝等
在卡倫交易可以就近進藏實

大皇帝格外之恩前次進藏由巴顏喀喇納木齊圖
穆倫渡穆魯烏蘇渡口彼處地雖險窄時因秋
令少雪行走尚易今值冬令若遇大雪不能過
險窄之處馬畜必致困乏今自此起程進藏當
踰哈什哈嶺在巴顏喀喇山後由布魯爾道路
行走仍渡穆魯烏蘇渡口道路平坦方為便利
巴雅斯瑚朗等聽從臣於次日將

聖主施

恩賞給該夷使等駝馬及第二次口糧俱行賞給該
夷使等感激欣喜復請照前例將沈重什物疲
瘦馬駝留交三十八人在哈濟爾得卜特爾地
方寄頓臣照依所請派人照看俟熬茶事畢該
夷使由噶斯一路回巢時此處照看之人送至
噶斯令其一同回巢其因交易前來回子瑪米
第等十二人據夷使稱回教不同不必帶往藏
內臣即派人送出卡倫先行回巢臣於十一月

十三日帶領該夷使起程進藏奏入報

聞

十二月辛巳

以安插青州厄魯特博羅特等潛逃被獲正法
示衆

上諭內閣曰理藩院以安插青州之厄魯特內有逃
走旋經拏獲博羅特等五人請旨正法應如所奏
派侍衛賽音圖理藩院郎中善泰即速馳驛前往

青州會同該將軍詢問伊等逃走情由傳集在彼
投誠之厄魯特及官兵等一同觀看將博羅特等
五人即行正法

命各省駐防將軍大臣嚴密防範安插厄魯特回人
等

上諭軍機大臣等曰據理藩院奏稱安插青州之厄
魯特博羅特等約齊逃走經官兵追趕將五人拏
獲已降旨即行正法以昭國憲伊等逃時將軍額

爾圖尚未丁憂似此逆賊理應一面嚴緝一面奏
聞拏獲時即問明緣由正法乃博羅特等於九月
二十七日逃走而副都統三達色遲延許久始行
具報又惟以錢糧咨請觀此可知伊等全不曉事
將軍副都統俱係駐防地方大員乃不知事之輕
重至於此極辦理草率實屬不合額爾圖三達色
俱著傳旨嚴行申飭並傳諭各省駐防將軍大臣
各處俱有安插此等厄魯特回人令其密行防範

毋稍疎懈然並非於無事時欲其過嚴在投誠人等俱屬安靜若因此一事稍露形跡伊等知覺反生疑懼致滋事端亦有不便該將軍等務宜用心妥協辦理其未經拏獲之厄魯特達什哈乃去歲投來安插內地居住一年有餘通曉內地言語地方情形伊若將內地道路沿途詢知逃回準噶爾地方甚有關係著開明達什哈年貌交與兩路將軍大臣傳諭各處卡倫嚴行查緝並行文直隸

山西陝西甘肅四川河南等處督撫令其留心加
緊查拏斷勿使之免脫以致逃回巢穴俟於何處
拏獲時即速奏聞

己亥

定議減派軍營綠旗換班兵丁

定邊副將軍額駙策凌奏言軍營綠旗兵向例
三年一換嗣以軍前無事改為五年一換現在
宣化大同二處派往兵丁已滿五年應請更換

奏入得

旨軍機大臣議奏尋議綠旗兵丁原因軍營糧草軍器甚多令其看守並無別事現在所派綠旗兵六百名請酌量留三百名俟蒙古等熟習之後再行全撤如蒙

俞允明年更換時止派三百名前往並請專派宣化所轄兵丁其大同兵丁停其派往奏入

上從之

平定準噶爾方略前編卷五十